

uant que perfonne mangeaft. Je le dis en Latin, & luy en fa langue Sauuage. Pendant qu'ils mangeoient, comme ie leur voulus expliquer quelque poincts de noftre creance, laiffe moy parler, dit le Sauuage. Là deffus il leur deduisit avec telle emphafe la creation du monde, & de deluge, & plufieurs autres articles de noftre foy, que i'en demurai tout rauï, & enuieux d'en pouuoir dire autant. O quelle difference entre vn homme qui parle, & vn enfant qui begaie, non ie ne croi pas que fi on auoit la perfection de la langue, qu'on n'obtint beaucoup fur ces peuples. Au refte ie ne fçauois iuger de l'intention de cét homme, mais ie puis affeurer qu'il difoit bien, & qu'il conceuoit ce qu'il difoit, ie ne fçai pas s'il le gouftoit. [271 i.e., 267] Ces barbares ont redoublé leur palliffade, en plantant vne feconde, efloignée d'un pied & demy ou enuirõ de la premiere, avec deffein de remplir ce vuide de faucines & de terre. Il femble qu'ils fe veulent fortifier tout de bon. Ils ont fait vne ordonnance, que perfonne ne iettaft aucune ordure dedans leur fort. Ce matin toutes les femmes font allées à la Riuiere lauer leur chauderons, & leurs plats ou efcuelles defcorces. Il n'y a que deux familles qui fe foient mifes à defricher, celle de *Etinechkaëuat*, & de *Nenaskoumat*. Celuy-cy a defia plus de demi arpent d'enfemécé, il affeure qu'il fera vn grand champ l'an prochain, fi on le peut aider, il a plufieurs enfans, & de bonne façon; s'ils prennēt la mefme volonté, ils reüffiront. Je luy ay promis toute forte d'affiftance, felon noftre petit pouuoir, & par auance ie leur ay fait present à tous deux de la graine de bled d'Inde, qu'ils ont femé, Dieu leur vueille donner la conftance. Puis que vos occupatiõs ne vous